

Exposicion di e dos hobennan Aruba ta ser prolonga

ORANJESTAD(AAN)- Debi na e interes cu publico a demostra pa e exposicion di pintura di e dos hobennan Ephraim Britten y Danilo Geerman, Biblioteca Nacional a coopera pa prolonga e exposicion aki un siman mas, di 2 pa 9 di September.

Fundacion Osticeba por a nota cu hopi hende a sa di

aprecia e trabao di e dos hobennan aki, y e hubentud presente na un forma constructivo tabata haci nan remarcnan na e hoben pintornan.

Danilo y Ephraim conhuntamente cu fundacion Osticeba ta haci un invitacion na esnan cu no a haya oportunidad ainda pa wak e obranan pa bishita e exposicion aki.

Cu Mama Maria na caminda pa e hubileo di año 2000

Clausura di año mariano tabata un evento di importancia den henter Iglesia y tambe y tambe pa Iglesia local di Aruba. Diasabra 13 di Augustus tabata tin alrededor di Dos Mil Persona cu a reuni mainta tempran na Alto Vista. Tabata scur ainda ora cu nan a cuminsa cana e ultimo parti di e caminda pa e lugar historico caminda na año 1750 e prome misa di Aruba a ser construi y caminda nos antepasadonan a reuni den e mesun fe di un generacion pa otro.

Durante e procesion pa e capilla solo a sali y di dia a habri, momento grandi ora cu den poco minuut henter ambiente ta cambia y claridad ta bin baha ariba tur cerito den vecindario.

Instintivamente mester a pensa ariba e palabra for di enciclopedia di papa Juan Pablo, esta cu Maria ta manera e strea di marduga cu a anuncia binimento di solo, cu ta Cristo Señor.

Hunto cu nos obispo y cu clero di nos pais nos a celebra den liturgia di Iglesia e misterionan sagrado di nos fe, e Eucharistia, centro di nos bida cristian, caminda nos tin nos encuentro cu Señor.

Clausura di año mariano tabata un fin, ma un principio nobo tambe. Hunto cu Maria, esun prome cu a kere y a biba den fe, nos ta pone nos pasonan ariba caminda pa e hubileo grandi di henter cristiandad aki 12 año. Cu Mama Maria na caminda nos hendenan di fe y oracion nos ta tuma nos rosario na man. E oracion di rosario ta un forma di oracion inspira pa Bijbel mes y dirigi ariba e misterionan cu a tuma lguar rond di nacimiento, morto y resurreccion di Hesu Cristo. E ta e oracion di hendenan humilde, aunque cu e no ta un oracion facil. Sin embargo a sali na cla den curso di historia cu e oracion aki a haya acogida cerca Dios, cu e ta agradable na Dios.

Mientras cu nos ta reza nos ta laga nos pensamentonan bay na Dios su obranan grandi cu el a haci den Hesu Cristo. Un oracion meditativo anto cu ta siña nos di distancia un poco di tur nos trabao y ocupacionnan, di nos problemanan y di tur loke ta hala mucho atencion henter dia.

Facilmente nos ta bisa cu nos no tin tempo pa esey maske e ta yuda nos di yega na un bida mas feliz. Tin hende cu ta cologa nan rosario den auto of na muraya den cas. Cuestion ta cu nan ta rese tambe, anto cada dia, den tempo malo ma den tempo bon tambe.

Rosario ta dirigi nos ariba e momentonan mas principal den historia di mundo, ora cu Dios a mostra su misericordia den persona di Hesu Cristo.

Y cada fin di siman nos ta reuni como pueblo di creyentenan pa celebra e misterionan di nos salvacion cu ta bini presente y ta worde actualiza meimei di nos. Den liturgia di Iglesia ta Cristo mes ta actua como e Gran Sacerdote pa santifica e hendenan, kendenan hunto cu otro y den union cu Señor ta forma e curpa místico di Cristo.

Den liturgia, specialmente den celebracion di Eucharistia ta Cristo mes hunto cu e pueblo di Dios como miembronan di su curpa, ta presenta e homenahe mas grandioso na Dios. Of mihor bisa: den liturgia di Iglesia tin un movimiento for di Dios pa nos den locual Dios ta santifica nos y tambe un movimiento for di nos pa Dios den locual nos ta glorifica Dios.

E santificacion di hendenan y nan alabanza pa Dios a tuma lugar den persona di Hesu Cristo y totalmente pa medio di dje, ora nos ta bini hunto anto pa celebra santo sacrificio di Misa ta Cristo como Sacerdote ta realiza un intercambio denter di Dios y hendenan. Y ora nos ta celebra e misterionan di Cristo su bida, morto y resurreccion Iglesia tin un preferencia special pa Mama Maria, pa honorele como esun cu mas cu cualkier otro criatura tabata asocia cu e trabao di salvacion.

Kibendicion lo bini pa e famia caminda e diferente miembronan ta reza conhuntamente e rosario, ta crece den union cu Cristo y ta honra Mama Maria pa su intimo participacion den historia di salvacion.

Pader J. Bouman o.p.



Dia 2 di September 1988 Cuerpo Policial Arubano a tuma despedida di sr. Damian Maduro kende tabata traha na e garage di polis. Sr. Maduro a cuminsa traha dia 8 di October 1956 na e edificio di brandweer na Bucutiwe 3. E temp ey personal di grage tabata ocupa dos puesto tanto mecanico como bombero. Sr. Maduro a cuminsa como arbeider chauffeur. Despues el a ser promove pa Monteur B, despues monteur A. Sr. Marbe tabata brandwacht eerste klasse y despues di separacion entre brandweer y polis el a bira technische beampte eerste klasse A. Sr. Maduro ta casa cu sra. Grace St. Jago y nan tin tres yiu. E ta worde caracteriza pa su hefenan como un trahador dinamico y cu semper tabata tin atencion pa su trabao. E foto ta ilustra momento cu sr. Maduro ta tuma despedida den presencia di su distinguida esposa, sr. Comisario di polis, su hefe directo Sr. Chido Maduro y su coleganan di trabao y otro oficialnan di polis.

Actividadnan cultural cu yegada di barco di guerra na San Nicolas

ORANJESTAD(AAN)- Awe mainta 11'or lo yega Aruba e barco di guerra Norte Americano, U.S.S. Ticoderoga, bao mando di e capitán J.M. Arrison, III.

Pa e periodo cu e barco aki lo ta mara den waf na San Nicolas, gobierno hunto cu organizacionnan di San Nicolas a prepara algun actividadnan cultural ariba Diasabra, Diadomingo y Dialuna.

E programa ta encera un ceremonia di recepcion Diasabra mainta na yegada di e barco, sigui pa un manifestacion cultural ariba Promenade cu actuacion di Time, Aruba Sunny Island

Steel Orchestra, y grupo di baile Guadirikiri. Ademas e cay principal di e centro comercial di San Nicolas lo dispone di un ambiente di musica cu cooperacion di Eddy Tec, y e caha di orgel Melodia di Antaño.

Despues di esaki lo tin un beachparty na Esso Club. Mester menciona cu durante e actividad ariba menciona den

Promenade lo tin stands disponible pa publico bishitante cu mercaderianan local, entre otro artesanía, obranan di man, souvenirs, cos dushi etc.

Diadomingo publico local tin e oportunidad pa bishita e barco di guerra entre 12.30 y 5.30 di atardi. Como parti di actividad aki na entrada di "Lagagate" lo tin stands pa deleita e publico. Dialuna anochi pueblo di Aruba lo despedi di USS Ticoderoga cu

un tremendo show musical ariba Promeaade, esta un "Megaforce Riot".

Pa haci e dianan di actividad aki un exito rotundo tur comerciante di San Nicolas ta ser pidi pa dedica atencion pa dorna e vitrinanan di nan respectivo

tiendanan. Pueblo di San Nicolas y Aruba en general ta ser pidi pa duna USS Ticoderoga un caluroso bon bini awe y durante e demas actividadnan menciona.

Klas di condicion fisico pa cabayero

ORANJESTAD(AAN)- San Nicolas YMCA ta desea invita pa reta tur cabayeronan cu ta den condicion of cu lo kier ta den mihor condicion.

Actividadnan lo inclui aerobics, ehercicio di forza, calisthenics y rek. Klasnan lo ser teni for di 6'or pa 7'or p.m. ariba Diasabra, cuminzando 10

di September. Personanan cu inscribi mester ta miembro di YMCA.

Lo no cobra pa klas di September. Registra awe mes.

YMCA tambe ta recorda tur damanan cu awor tin klasnan pa damas ariba Dialuna y Diahuebs pa 7'or. Pa mas informacion 45303.